

Aruba su Dande: un herencia valioso

Pa: Hildward y Maikito Croes

Hildward ta skirbi:

"Dande ta mas cu un tradicion. E ta un herencia cu ta core den nos venanan".

For di chiquito nos a wordo lanta cu e amor pa nos folklore pa medio di e musica cu semper a reina den nos famia. E ritual di Dande tabata semper bibo den e conhunto di Mo Tito cu tabata pasa cu e bishita y saludo musical aki serca tur famia, bisña, y amigonan di nan tempo. Mi abuelo Jonchi Croes tabata e prome cantante pa graba un Dande cu e 'Conhunto Folklorico Arubano' di Mo Tito. E tempo ey ariba disco 78 graba pa Padu Del Caribe. Mi tata Maiky di chikito tabata cantante di reserva cu e grupo di Mo Tito y a continua e herencia aki na momento cu omo Betico a forma su grupo despues di su regreso di Hulanda na aña 1959.

Di mucha caba mi tabata haya e oportunidad pa toca cu e grupo ariba percussion, cuarta y despues sinfonia di man. Cu 'Betico y su Grupo' y despues 'Grupo Di Betico' nos a participa na tur 'Festival di Dande' desde su inicio den añanan 70 cu excepcion di un par di aña cu nos a ausencia pa motibo di luto. Simpel di melodia y estructura harmonico, ritmicamente repetitivo, y su forma di canto yamada y contesta, ta locual ta duna e Dande su caracter tan especial. Aunque cu cada un di nos ta aporta ingredientenan musical personal na e genero aki, Dande mester wordo conserva pa mas tanto posibel den su forma original. Ta bon pues pa na momento di interpreta un Dande

nos bay bek na su raiz, analizando profundamente e grabacionnan di mas bieuw cu por tin pa asina comprende su esencia real. Dande ta un canto di sentimiento noble, un canto cu ta sali di alma deseando dicha, prosperidad, tur e cosnan positivo y bunita cu bida por ofrece na humanidad, pero ariba tur cos e plegaria di bendicion na nos bon Dios pa nos prohimo. Na e mesun momento e ta un canto di gratitud di por mira un otro cambio di aña. E placa of gesto cu ta ser tira den e sombre pues ta simbolisa mas bien un intercambio, y no un pago manera hopi ta kere, pa e gesto di bon voluntad aki.

Maikito ta reflecciona ariba su herencia:

"Maikito lanta...nan ta yegando, nos ta tende nan ta canta na Mo Fichi caba!"

Ta mescos cu ta ayera ... mi ta corda cu asina cu e pito di Lago anuncia mei anochi (diesdos'or) nos ta sende e pagara y e vuurwerknan na cas pa yama e aña nobo bonbini ... mesora despues mi mama Ada y mi tata Maiky ta pone nos, Hildward cu'mi, drumi pa ser lanta ora cu e 'Paranda di Mo Tito' yega cas. "Maikito lanta...nan ta yegando, nos ta tende nan ta canta na Mo Fichi caba!" Mi mama ta lanta nos for di soño y den nos pijama nobo nos ta bai para den porta di cas pa spera 'Nos Dande di Padu Jonchi'.

Nos Dande ta un herencia cultural hopi valioso y mi ta sinti'mi sumamente feliz di por a lanta den e tradicion aki. Inspira pa nan

creencia spiritual y nan alegria, nos grandinan a crea atravez di nos folklore un systema unico pa hiba un mensahe hopi profundo y e deseo di bendicion den e aña nobo pa nan sernan keri, famia, bisña y amigonan. 'Nos Dande' ta unico y e ta di nos, ban protehe y cuide!

Semper mi a admira inmensamente e don di mi Padu Jonchi y mi Papa Maiky den nan expresionnan sincero y profundo atravez di nan Dande. Mi a desea di sigui nan pasonan y conseqwentemente mi a hasi mi entrada como cantante di Dande cu 'Grupo di Betico' den e Festival di Dande di 1997 cu a wordo dedica na mi tata Maiky. Como cu mi a crece den e tradicion aki, mi a sinti'mi manera un berdadero Rey dia cu mi a ser corona como e 'di 25 Rey di Dande' na December 1998. Un soño a bira realidad! Cu lagrima y cu inmenso felicidad mi a accepta e titulo un biaha mas aña pasa como 'Rey di Dande 2002/2003'.

E mainta despues cu mi a bira 'Rey di Dande' pa prome biaha, mi yiu homber Michael a puntra'mi: "Papi, ki dia ami por cuminsa canta Dande y sigui cu e herencia familiar aki?" "Wel Michael mi yiu, e dia cu bo ta sinti'bo cla bo ta cuminsa. Ta boso, nos hubentud, mester continua cu e 'herencia valioso' aki y percura pa pase pa boso futuro generacionnan pa 'Nos Dande' biba pa semper!"